

N bel detelpai Reinhard!

I bec de la scolina de Soraga à cognosciù l lurier del pasticer



I bec de la scolina de Soraga con le maestre e Reinhard.

Soraga - Sion amò noi, i bec de la scolina de Soraga. Con chest picol scrit volon ve contar na belota scomenzadiva. Per na di sion doventé "pasticeres" e a la dir duta "pasticeres de nonzech". Chest l'é stat possibol de gra a Reinhard e Antonella de la conditoria de Vich.

En ocajon de l'Aisciuda Ladina ence noi bec aon volù cognoscer da vejìn l lurier di artejegn de noscia val. Reinhard con so far gustéjol e con n muie de pazienza l ne à portà tel mond di "douces". Aon podù mescedar, empastar, durar l sciadass, tastar, aon metù coche i disc aldidanché "le man en pasta". Duc, gregn e picoi, aon podù se far na picola peta da bachec da portar a ciasa. Sion stac neto stoc canche ge aon moscià nosc lurier a noscia mare e a nosc pare.

Reinhard con n lengaz scempie e tel medemo temp leà a noscia vita l'é stat bon de ciapar noscia atenzion: "La pasta ades la cogn pussar desche

voi canche jide a pussar domarena, ades co la farina e l smauz fajn na picola coa". E che dir de le "magie" che Reinhard con soe man l'à fat co la pasta de mandorla. Duc siane co la bocia averta, encanté a veder nascer vigni sort de picoi animai. Tu es stat dalbon nosc "mago".

Noi sion picoi, ma volon caro

Reinhard te dir col cher n gran detelpai e te manar n braciacol. E da veder fosc da chesta picola scomenzadiva podarà crescer te noi la voa de emparar to lurier, noi l "maester" l'aon troà.

Con simpatia,
i bec de la scolina de Soraga



Ne ensegneste Reinhard a far de bogn douces?

Terza edizione per la "Maratona de letura"

Ence chest an, endèna l'Aisciuda ladina, tropes fascegn se à fat inant per l piajer de lejer e de ge fèr cognoscer ai etres vèlch piata, veia o neva, scritta per ladìn

Sèn Jan - L'é l terzo an che l Comun General, adum con l'autra istituzions e sociazioms culturèles de Fascia, endreza l'Aisciuda ladina, la setemèna duta dedichèda al lengaz e a l'identità te noscia val. E l'é la terza outa che vegn endreza, delaite da cheta setemèna, ence la "maratona de letura".

Se trata de lejer non-stop per ladin per 7 o 8 ores alalongia, per doi o trei dis. Chest an, desche l'an passà, a endrezèr chesta maratona se à metù l grop di voluntadives del lengaz, na ventina de jent che dal 2009 se bina sche ogne doi setemènes, con Sabrina Rasom coordinadora e responsabola de l'Ofize linguistich del Comun General de Fascia, per descòrere per ladin. Coscità i tegn vif l ladin e i lo porta stroz per la val, ensema al gust de ciacolèr, ciantèr, scrìver, traslatèr e fèr dut per ladin.

Chest an a la maratona de letura se à scrit ite trenta persones, fascegn e no fascegn enciasé de chiò sù, picoi, gregn, studenc, ciasalines e pensioné, che se à postà dedò n microfon te Museo Ladin e i à let jù zeche che i à cernù ic medemi. N'é stat de chi che te la letadura i à troà scric de si parenc e i à volù i portèr endò a la lum con n piz de encresciujum, etres à volù lejer

poejies, rimes e conties dates fora da l'Istitut Ladin e da la Union di Ladins, etres amò a cernù de lejer dant zeche che i à scrit ic medemi, desche Stefan Dell'Antonio che l publica ogne tant vèlch liber de bela stories, Ermanno Winterle, o la picola Chiara Rasom che de nience 12 egn l'à jà scrit enstessa na contia.

L liber più let e aprijà resta semper "Usanzes e tradizioms" de Simon de Giulio da Penia, che meis per meis l conta de lurieres da zacan, festes, usanzes che l'era te cèsa, te ciamp e pra e te geja.

Ence l teater l'é stat interpretà tedant microfon da trei di 15 joegn studenc de la scola d'èrt e del liceo scientifich de Poza che à tout pèrt a la maratona. Chesta de la maratona l'é stat na ocajon, fosc unica fora per l'an, per uzèr fora l bel del lejer, e del lejer per ladin che l'é amò più bel. Chi che à tout pèrt a la scomenzadiva di voluntadives del lengaz i è stac touc jù da la telecameres de la televizion che li mosciarà, un a l'outa, via per chisc meis che vegn su TML. Coscità ence chi che no lec, arà l met de se arvejinèr al gran patrimoni leterèr scrit per fascian che l'é stat metù adum da Simon de Giulio en cà, e ence inant da el, da tenc fascegn co la pascion del lapisc e l papier. (mac)



N moment de la Maratona de letura endrezèda per l terzo an dai voluntadives del lengaz.

Chi èl pa?

Soluzion del retrat su La USC nr 19

L retrat che aon publicà la setemèna passèda l ne era stat portà da Lino Soraperra Medico, e l vegn cà da la Val Badia, e più

avisa da Ugo Pezzei, da La Ila ma con reijes te Fascia, che l'é l fi de l'om che l'é sul retrat con numer 1. L retrat era stat fat alò da l'albergo

Rizzi de Salin a Pera anter i egn 1935 e 1937 e a ne dèr la soluzion, apede a Lino, l'é stat demò Giuseppina Rossetti.

Sul retrat l'é: 1. Vito Pezzei de Frighela; 2. Alfonso Lorenz de Candol; 3. Federico Bassetti de Cionfie; 4. Alfonso Cloch de Cò, giàf de l'ombolt de Cianacei, Mariano Cloch. Chesta setemèna reston amò en tem de rodes e de Giro de la Tèlia e ve meton dant n auter bel retrat, che ne é stat portà da Mariella Lorenz Rasom da Vich e l'à a che fèr con n coridor de gran nonzech, che de segur duc cognosciarà fora sobito. Nos ve envion aboncont a endoinèr ence i etres che l'é sul retrat.

Speton voscia respostes per telefon o fax al 0462.764545, o per mail a la direzion lausc@ladinsdefascia.it. Ge sporjon n bel

develpai a chi che se sproa a troèr fora la jent e a chi che ne porta i retrac, e i ne deida coscità a viventèr chesta rubrica e a meter ensema

vèlch mizacola de storia de noscia jent: ve envion a ve fèr inant per ciapèr en don na publicazion de l'Union di Ladins.

